

## **EFESO**

# **Faulo yana kiluma me Efeso 'waidie.**

Tutuyanina Faulo i miamia Loma vanuga 'eba yogona nageneye leta 4 i kilumidi. Tamu leta tovetumaganavo i miamiani Efeso 'waineye faifaidi, tamu me Filifai faifaidi, tamu me Kolose faifaidi, we'e tamu Filimoni faifaina. De'e letanina i kilumiga me Efeso faifaidi nagami i na lu'iawawai i na 'a'avana mulieta tovetumaganavo 'atamana 'ifwaidi 'waidie letanina i na lu'iawawai.

Efeso tamu 'atamana 'ana wagava bwaikina 'awalawa Eisia nageneye. Tomotoganidi bei i miamianiga kukua 'ana nuanua 'waidie bwaikina wata taunidi i tauyedi tamu yaubada-vekavekali 'waineye 'ana wagava Daiana. We'e Efeso nageneye tamu vanuga 'eba velu'ui 'atumaiotogina i tovotovoi Daiana faifaina. (Folova 19:17).

Faulo yana lauvivila 'ana veluga 'waineye bei i lau'age me Diu 'waidie 'Aiata Veawai 'waineye. (Folova 18:18-21). We'e yana lauvivila 'ana vetonu 'waineye i nago Efeso bei i miamia malamala 'aitonu 'waidie i veve. (Folova 19). Me Efeso fuedi taunidi mali tomotoga kebu Diu, siwe wata 'ifwaidi me Diu taiadi i miamiani. Faulo i ve 'waidie Keliso 'wainega me Diu wata taunidi kebu Diu iluvetubama, bega tutuya de'e tomotoga matatabudi Keliso taiadi i mia've'itubama, 'aila'a 'aitamogana. Wata Faulo Keliso yana 'Aila'a i awatalatutulen'i nani 'aitonu 'waidiega. 'Ida Keliso tomogona, taunina yada to'edakumeta. Wata

'ida Yaubada yana vanuga, we'e Keliso taunina 'asa'aiana vanuganina 'ana 'unututu. Wata Faulo i awatalatutula Keliso yana 'Aila'a bani'odi yana vavine. De'e letanina 'ana 'idi side bani'odi.

Vona-vekaiwa. 1:1-2

Yaubada yana nuakalikali, wata yada miave'itubama Keliso taiadi faifaidi. 1:3-3:21  
Tovetumaganavo i lubwainedi yadi nuanua 'aitamogana. 4:1-16

Tovetumaganavo i lubwainedi sauluva dududubalidi i na bailedi. 4:17-5:20

Tovetumaganavo i lubwainedi ma yadi nuakalikali taunidi i na tauyedi ediavo tovetumaganaga 'waidie. 5:21-6:10

Keliso yana toketokena 'wainega tovetumaganavo i na vetoketoke Seitani ma yana 'aila'a 'waidiega. 6:11-20

Faulo yana 'alanuai. 6:21-24

<sup>1</sup> ✝Ekwavo, yau Faulo, a vekaiwa 'waimie. Yaubada nuanuana, bega a vetomata'aulele Iesu Keliso faifaina, we'e 'omi Yaubada yana tomotoga 'wa miamianiga 'atamana Efeso 'waineye, kumanimiavo Keliso 'ana todumwebika 'wa miave'itubama taiadi, 'waimie a kilukiluma.

<sup>2</sup> A vevelu'ui faifaimi, nuanuaku Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie, wata nuanua bikadi mia 'atumaina taiadi i na velevlelemi.

*Yaubada i vesauluva 'atumaina 'waideye Iesu Keliso 'wainega.*

---

✝ **1:1:** Fol 18:19-21; 19:1-40; 20:17-38

**3** Ma yada sosoana ta na vekaiwa 'ada Toveimea Iesu Keliso yana Yaubada wata Tamana 'waineye. I lubwaineda ta na subiai fai nuakalikali tulina tulina abamega 'akonadi i veleda 'anu'anunuda yadi mia 'atumaina faifaina, 'ida kumanida ta miave'itubama Keliso taiadi.

**4-5** <sup>◊</sup>Bola kebu fwayafwaya i da 'idewaiga, 'ida Keliso taiadi ta miave'itubamaga Yaubada i venua'ivina-vagaseda bega mataneye yada sauluva magemagetadi kebu tamu yada sakonaga. Fai i nuakalikalieda nagami i venua'ivineda bega Iesu Keliso 'wainega i fayayeda nika 'ida natunavo. De'e bani'odi i vesauluvediga 'waideye fai taunina yana nuanua 'wainega, yana 'eba sosoana faifaina.

**6** Yaubada yana nuakalikali magemagetana i vesauluva 'atumaina 'waideye Natuna nuafouna 'wainega begaidi ta na subiai ta na vo, Yaubada, yamu 'anivelena-maimaiga 'waimeye 'atumaiotogina."

**7-9** <sup>◊</sup>Fai 'ida ta miave'itubama Iesu Keliso taiadi, yana wafa 'wainega Yaubada i tuveobuda. Basenadi ta sakosakona 'wa da vo sakonanna i da yagonida, siwe Keliso dayagina i ilolo faifaida i yavuda sakona 'wainega nika Yaubada i nuatavunida. Vona mogitana yana nuakalikali wata yana 'anivelena-maimaiga 'waideye bwaikaotogina. Yaubada yana 'aseta bwaikina i vevuela'ivina-'atumai bega basenadiotoga yana nuanua givagivana i 'idewai Keliso faifaina. Yana nuanuananina yana 'eba sosoana, 'akonadi i sivemageseni 'waideye.

**10** Yana nuanuananina side bani'odi. Tutuyanina Yaubada nuanuana, tutuya 'eba ve'a'ava 'waineye, nani matatabuna abamega wata fwayafwayayega taiadi i na va'augida, 'ada to'edakumeta 'aiseotogina Keliso.

**11** Yaubada nani matatabuna i 'i'idewadi yana nuanua bani'odi. Wata bani'odi nagami Yaubada i venua'ivineda yana nuanua i na 'idewadi 'waidega. Wata i venua'ivineda bega 'ida yana tomotoga mogitana, Keliso taiadi ta miave'itubama.

**12** <sup>13</sup> 'Ima 'a kumeta yama vetumagana 'a yatoi Keliso 'waineye bega 'a lulukamata i na 'ita'ita'iemafaifaina. Yaubada nuanuana yana 'ai'aiwabu magemagetadi 'a na sisivemagesedi nika tomotoga i na subisubiai.

**13** <sup>14</sup> Omi wata bani'odi, tutuyanina Iesu Valana 'Atumaina 'ami 'ita'ita'i faifaina 'wa nogai 'wa vetumagana Keliso 'waineye. Valanina Yaubada yana Vona Tonovidi, 'wa vetumagana 'waineye begaidi Keliso taiadi 'wa miave'itubama nika Yaubada yana tugusa i yatoi 'waimie. Tugusanina 'Anu'anunu 'Atumaina i agemi, bani'odi basenadi Yaubada i vona'awaufaufa i na tauyeni 'waideye.

**14** <sup>15</sup> **Anu'anununina** 'Atumaina 'wainega Yaubada i veakutagonida 'ida yana tomotoga mogitana, yada 'eba 'isa 'awaie 'ada veuveuta ta na veluagadi 'wainega. Wata fai Yaubada 'Anu'anunu 'Atumaina i tauyeni i ageda ta 'asetai 'awaie yana tomotoga matatabuda i na tuveobu'a'avada sakona 'wainega. Bega matatabuda Yaubada Magemagetana ta na subiai.

---

<sup>13</sup> **1:13:** Efe 4:30    <sup>14</sup> **1:14:** 2 Kol 1:22

*Faulo i velu'ui nuanuana me Efeso i na 'asetai  
Keliso bwaikaotogina.*

15-16 ◊Fai Yaubada yana nuakalikali bwaikaotogina 'ida yana tomotoga 'waideye, tutuya matatabuna a vevekaiwa 'waineye faifaimi. Basenadi valami a nogai yami vetumagana toketokena 'ada Toveimea Iesu 'waineye wata Yaubada yana tomotoga 'wa nunuakalikaliedi, tutuyanina 'wainega i maiga 'asiau faifaimi a vevelu'ui-vebogi kebu tamu tutuya a da venuafanimi.

17 Wata a vevelu'ui, nuanuaku 'ada Toveimea Iesu Keliso yana Yaubada, taunina Tamada Magemagetana nuanua 'anibwekabwekana i na veleveleemi wata taunina i na sivemageseni 'waimie nika yami 'aseta Yaubada faifaina i na vebwaika.

18 Wata nuanuaku nuami i na magetadi bega 'wa na 'asetai i venua'ivinemiga 'ita'ita'i 'wa na veluagai, naninina bwaikaotogina faifaina ma yami vetumagana 'wa lulukamata. Wata nuanuaku 'wa na 'asetai 'ida yana tomotoga 'ada veuveuta magemagetadi ta na veluagadi 'wainega.

19-20 ◊Wata nuanuaku 'wa na 'asetai Yaubada yana toketokena bwaikaotogina i folofolova 'ida 'ana tovetumaganavo 'waideye, kebu tamu aitoi yana toketokena bani'odi. Toketokenanina 'wainega Keliso i sivetovoia wafayega i vemiabuia 'ana 'atagiega, abame ma yana veimea i miamia.

21 ◊I veveimea abama tabwaotogineye, taunina bwaikaotogina kebu tamu aitoi bani'odi. Kini,

---

◊ 1:15-16: Kolos 1:4-11    ◊ 1:19-20: Ibu 1:3,13    ◊ 1:21: Kolos 2:15; Fil 2:9-10

toveimea tulina tulina, anelose, yaiaina, gabemani, tomotoganidi toketokedi ma 'adi ve'ililibu tutuya de'e 'waineye wata tutuya i mimaiga 'waineye, matatabudi 'adi wagava sai'af, we'e Keliso bwaikaotogina.

**22** <sup>✧</sup>Yaubada Keliso i silakai, nani matatabuna i veveimeyed, wata i venua'ivineni i veto'isave'avina 'ida tovetumagana 'ada 'aila'a 'waineye.

**23** 'Ida Keliso Tomogona, we'e 'unu'unu 'asa'aiana taunina. Nani matatabuna fwayefwayeye, 'ai'edi 'aise'avadiga i da ve nani'avo'avovo, siwe fai Keliso i 'i'isave'avinidi i luvetubama taiadi. Wata ban'i'odi 'ida Keliso 'ana tovetumaganavo, 'ako 'aise'avadaga ta da venani'avo'avovo, siwe fai Keliso i 'i'isave'avinida bega taiadi ta miave'itubama nika Keliso Tomogona i souyen.

## 2

*Nagami 'ida bani'odi towafa, Keliso mia 'ivauna i veleda.*

**1** <sup>✧</sup>We'e 'omi nagami bani'odi towafa. Yaubada yana ve'etoboda 'wa geugeudi taunimi 'wa tauyemi sakona 'waidie bega 'anu'anunumi wafawafadi.

**2** <sup>✧</sup>Yami mia matatabuna 'waidie fwayafwaya 'ana nuanua sakoidi 'wa vevetutuyamedi wata Seitani yaiaina yadi to'edakumeta, kumanina

---

<sup>✧</sup> **1:22:** Kolos 1:18    <sup>✧</sup> **2:1:** Kolos 2:13    <sup>✧</sup> **2:2:** Efe 6:12

kebu ta da 'ise'iseniga, 'wa vevematayakeyakeni. Tutuya de'e Seitaninina Yaubada 'ana tovedumwe'ai'ai i lulukakadedi yana nuanua sakoidi i 'i'idewadi.

**3** ☆Wata 'ida basenadi tovedumwe'ai'ainidi bani'odi. Taunida ta tauyeda bunu 'ana nuanua sakoidi 'waidie bega sakonanidi tomogoda yadi nuanua wata nuada i 'ewadi, 'asa'aiana ta 'i'idewadimo. Yada tubuga 'waidiega 'ida ta sakosakona tomotoga matatabudi bani'odi, i lubwaineda Yaubada ma yana nuasako i da vematavulogida yada sakonanidi faifaidi.

**4-5** We'e Yaubada 'ana wagava To'isanuakalikali. Fai yana nuakalikali bwaikaotogina 'waideye, bani'odi Keliso i sivetovoia wafayega wata 'ida 'anu'anunuda wafawafadi yawai i veledi i yawasa-vaitugana bega Keliso taiadi ta miave'itubama. Vona mogitana, avinodi nagami 'anu'anunuda wafawafadi fai ta sakona, siwe Yaubada mia 'ivauna wata 'atumaina i veleda. Yaubada yana nuakalikali kebu ta na vona, i nuakalikalieda nika i 'ita'ita'ieda.

**6** ☆Wata 'ida ta miave'itubama Iesu Keliso taiadi, bega ma fuedeye Yaubada i sivetovoida, mia 'ivauna i veleda i vemiabuida abame Kelisonina taiadi.

**7** ☆I vemiabuidaga Keliso taiadi, 'ida tomotoga yadi 'eba 'isa tutuya matatabuna faifaidi. 'Ada 'ita'ita'inina Yaubada yana 'anivelena-maimaiga 'atumaiotogina 'waideye, bega mali tomotoga i na 'iseni i na 'asetai yana nuakalikali 'ida ta mi-

ave'itubamaga Keliso taiadi 'waideye. Yana nuakalikalinina bwaikaotogina, kebu 'ada fata ta na 'etowavai.

<sup>8</sup> <sup>◊</sup>Fai Yaubada ma yana nuakalikali i vesauluva 'atumaina 'waimie, tutuyanina 'wa vetumagana Keliso 'waineye i 'ita'ita'iem, kebu taunimi yami folova 'waidiega, we'e mogitana Yaubada yana 'anivelenmaimaiga 'wainega.

<sup>9</sup> <sup>◊</sup>Wata 'ami 'ita'ita'inina kebu 'wa da veluagaiga yami folova toketokedi 'waidiega, 'wa veluagaiga Yaubada yana nuakalikali 'wainega begaidi kebu tamu aitoi 'ana fata taunina i na awa'ai'aia 'ita'ita'inina i veluagaiga faifaina.

<sup>10</sup> <sup>◊</sup>'Ida Yaubada 'ana 'idewadewa, i 'ive'ivauda Keliso taiadi ta miave'itubama bega Yaubada yana nuanua 'atumaidi ta na dumwebikedi. Yana nuanuananidi nagami i 'idewadi bega yada mia 'waidie bani'odi ta na vevesauluvedi.

### *Tovetumagana    matatabuda    'ada    'aila'a 'aitamogana*

#### *Keliso 'waineye.*

<sup>11</sup> 'Omi mali tomotoga kebu me Diu, yami mia nagami, 'wa na nuani. Basenadi 'ima me Diu 'a awaobuobuyemi 'a vo, Yaubada yana tugusa bunu 'aibobo kebu 'wa da 'ewaiga, bega 'omi kebu Yaubada yana tomotoga, 'ima 'aisema yana tomotoga." Tugusanina tomotoga nimadiega i 'idewai, tomogodi 'aisedi faifaidi.

<sup>12</sup> <sup>◊</sup>Yami mia nagami kebu Keliso taiadi 'wa da miave'itubama, 'wa mia'iaweni. Wata 'omi kebu

<sup>◊</sup> **2:8:** Lom 3:24; 2 Tim 1:9    <sup>◊</sup> **2:9:** Tai 3:5    <sup>◊</sup> **2:10:** Tai 2:14

<sup>◊</sup> **2:12:** Lom 9:4; 1 Tes 4:13

Yaubada yana tomotoga me Diu bani'odi, 'omi tulimi mali tomotoga. Basenadiotoga Yaubada 'ima me Diu i venua'ivinema yana veakutagona 'ana vona'awaufaufa i 'idewai 'ima 'aisema 'ama 'ita'ita'i faifaina, we'e 'omi kebu. Yami mia fwayafwaya de'e 'waineye yami Yaubada kebu, wata kebu 'wa da vetumagana 'awaie 'ita'ita'i 'wa na veluagai faifaina.

<sup>13</sup> Vona mogitana, basenadi 'ani'ieogose 'wa mi-amia Yaubada 'wainega, we'e tutuya de'e Keliso dayagina i ilolo faifaimi, Yaubada i miemi lilivan-eye bega 'wa miave'itubama Keliso taiadi.

<sup>14</sup> <sup>✡</sup>Basenadi me Diu wata mali tomotoga tau-nidi kebu Diu ta veve'idi'idi 'wa da vo nuasako i da bibineda. Siwe Keliso i mai yana wafa 'wainega nuasakonina i geuya, i vemiave'itubamida nika veiana i souyen'i, 'ida 'aila'a 'aitamogana. Keliso tauniotogina 'ada Toveiana mogitana, 'wainega matatabuda ta mia 'atumaina.

<sup>15</sup> Wata Keliso yana wafa 'wainega, me Diu yama ve'etoboda wata yama veimea yadi toketokena i 'ivemweadi bega 'ima me Diu wata 'omi mali tomotoga i luvetubamida nika 'ida 'aila'a 'aitamogana, matatabuda ta veiana wata Keliso taiadi ta miave'itubama.

<sup>16</sup> <sup>✡</sup>Basenadi 'ima wata 'omi Yaubada 'ana gaviavo, siwe Keliso i wafa 'ai lagalagana 'waineye bega ta luvetubama, Yaubada taiadi ta veiana. Wata yana wafanina 'wainega ve'idi'idi matatabuna i geuya.

<sup>17</sup> Wata Keliso i maiga, Vala 'Atumaina veiana faifaina i lau'age tomotoga matatabuda 'waideye,

---

<sup>✡</sup> **2:14:** Kolos 1:20; 1 Kol 12:13    <sup>✡</sup> **2:16:** Kolos 1:20,22

'omi mali tomotoga Yaubada 'wainega 'wa mia 'ani'ie, wata 'ima me Diu 'a miamianiga Yaubada lilivaneye.

**18** <sup>◊</sup>Fai bani'odi Keliso i veianeda, bega 'ima me Diu wata 'omi mali tomotoga 'ada fata ta na luku-luku Tamada Yaubada mataneye 'Anu'anununa 'aitamogana 'wainega.

**19** Fai Keliso i luvetubamida, 'omi kebu tulimiga wata 'omi kebu wakawaka, tutuya de'e 'wa luku Yaubada yana 'Aila'a 'waineye, matatabuda yana tomotoga mogitana.

**20** <sup>◊</sup>'Ida Yaubada yana 'Aila'a, yana vanuga bani'odi. Keliso taunina vanuganina 'ana 'unututu, we'e 'ima tomata'aulele tolu'ivonavo taiadi bani'odi 'ana 'ogola. 'Omi Yaubada yana 'Aila'a vanuganina luluna, i 'iyogonemi.

**21** <sup>◊</sup>Keliso vanuganina matatabuna i 'ivefa'ali, yana toketokena 'wainega i vevebwaika i na nagogga nika Vanuga 'eba Velu'ui 'Auvea faifaina i na souyen'i.

**22** <sup>◊</sup>Wata 'omi me Efeso, Yaubada yana tomotoga 'ifwaidi taiadi 'wa miave'itubama Keliso taiadi i 'iyogonemi vanuganina 'waineye, bei Yaubada i miamia 'Anu'anununa 'wainega. Side bani'odi, fai Yaubada 'Anu'anununa i ageda ta 'asetai Yaubada i vevanuga 'waideye.

### 3

*Yaubada yana nuanua givagivana i sivemageseni.*

---

<sup>◊</sup> **2:18:** Efe 3:12    <sup>◊</sup> **2:20:** Mad 16:18; 1 Kol 3:11    <sup>◊</sup> **2:21:** 1 Kol 3:16; Kolos 2:19    <sup>◊</sup> **2:22:** 2 Kol 6:16

**1** <sup>◊</sup>Yau Faulo, Iesu Keliso yana tofolova a luku vanuga 'eba yogona 'waineye faifaimi. 'Ima me Diu wata 'omi mali tomotoga yada miave'itubama Keliso taiadi faifaina a lalau'age begaidi i yatoku vanuga 'eba yogona 'waineye.

**2** A nuani 'akonadi valaku 'wa 'asetai Yaubada ma yana nuakalikali i venua'ivineku folovanna faifaina, bega 'omi mali tomotoga kebu Diu 'aivaita 'wa veluagai.

**3-4** <sup>◊</sup>Yaubada yana nuanua givagivana nagami a bavuyeni, siwe i sivemageseni 'waikuye. Yana nuanuananina faifaina 'akonadi a kiluma siwe kebu manamanawena, 'ale'usana, bega 'ai'edi 'wa na lu'iawawaiga yaku 'asetanina Yaubada yana nuanua givagivana Keliso faifaina 'wa na nuani.

**5** Basenadi Yaubada yana nuanuananina kebu i da lu'ivoneyeni tomotoga 'waidie, tutuya de'e 'Anu'anunu 'Atumaina 'wainega i sivemageseni yana tomata'aulelevo wata yana tolu'ivonavo magemagetadi 'waidie.

**6** <sup>◊</sup>Yaubada yana nuanuananina givagivana side bani'odi. Fai Keliso i wafa faifaida, bega kebu 'ima me Diu 'aisema 'ama veuveuta 'a na veluagadi Yaubada yana 'ai'aiwabu 'waidiega, 'omi wata mali tomotoga veuveutanidi ma fueda ta na veluagadi. Wata matatabuda ta luvetubama, 'ida Yaubada yana 'Aila'a 'aitamogana, we'e naninidi basenadi Yaubada i vona'awaufaufa i na 'idewai me Diu faifaima, tutuya de'e ma fueda 'adi mogitana ta veveluagadi. Naninidi i souyedi Iesu Keliso yana wafa 'wainega, 'akonadi ta nogai

Valana 'Atumaina 'wainega bega taiadi ta mi-ave'itubama.

<sup>7</sup> <sup>◊</sup>Iesu Valana 'Atumaina faifaina a vetofolovaga Yaubada yana venua'ivina 'wainega. A vetofolovaga, Yaubada yana 'anivelena-maimaiga 'atumaina 'waikuye, wata yana toketokena i veleku yaku folovanina faifaina.

<sup>8</sup> <sup>◊</sup>Yaubada yana tomotoga matatabuda 'waidega 'aku 'isa siaina, yau 'wa da vo kwamana. Avinodi 'aku 'isa siaina, siwe 'asa'aiana Yaubada i tauyeku Keliso yana 'ai'aiwabu magemagetana faifaina a lalau'age 'omi mali tomotoga 'waimie. 'Ai'aiwabunina bwaikaotogina, kebu 'ada fata ta na 'etowavaiga.

<sup>9</sup> <sup>◊</sup>Wata tamu folova i velekuga, Yaubada yana nuanua givagivana 'ada 'ita'ita'i faifaina a sisivemeseni bega tomotoga matatabudi 'adi fata i na 'asetai. Basenadiotoga i maiga tutuya de'e 'waineye, Yaubada yana nuanuananina givagivana kebu i da sivemeseni, nuaneye i 'eno'eno, tutuya de'e 'akonadi 'ana 'aseta magemagetana. Yaubadanina nani matatabuna wata 'ida taiadi, 'ada to'idewadewa.

<sup>10</sup> Tutuya de'e Yaubada yana nuanuananina i sivemeseni bega toveimea wata tomotoga toketokedi abame i na 'iseni Yaubada yana 'aseta bwaikina nani tulina tulina 'waidie. Yana 'aseta nina i na 'iseni Keliso 'ana tovetumaganavo 'waidega, 'ima me Diu wata 'omi mali tomotoga 'akonadi ta luvetubama bega Keliso yana 'Aila'a 'aitamogana.

**11** Basenadiotoga, bola fwayafwaya kebu i da 'idewaiga, Yaubada yana nuanua nuaneye i 'idewai, we'e tutuya de'e yana nuanuananina i souyen'i 'ada Toveimea Iesu Keliso 'wainega.

**12** **☆**Fai ta miave'itubama Keliso taiadi wata ta vetumagana 'waineye, kebu tamu ve'etoboda 'waideye i da 'eno'eno 'ada fata ta na lukuluku Yaubada mataneye ma yada venuafoufa'ala, ta nuani mogitana ma yana sosoana i na lu'uma'umaieda.

**13** **☆**Begaidi kebu nuanuaku 'wa na nuavita faifaiku i na nunago yami vetumagana i na mwea. Mogitana de'e vanuga 'eba yogona 'waineye a mi-amia, siwe vitanidi a veveluagadiga 'ami 'aivaita faifaina.

### *Keliso yana nuakalikali bwaikina.*

**14** Fai Yaubada yana nuanua givagivana i 'idewai 'ada 'ita'ita'i faifaina, begaidi ma yaku ve'ililibu a 'odu Tamada mataneye.

**15** Tamadanina 'ida yana 'Aila'a matatabuda abame wata fwayefwayeye 'ana wagava 'eba 'inana.

**16-18** **☆**A vevelu'ui Yaubada 'waineye faifaimi, nuanuaku yana 'ai'aiwabu magemagetana 'wainega yana toketokena i na velemi nika 'wa na vetoketoke. I na kiavetoketokemiga 'Anu'anununa 'wainega, wata fai 'wa vevetumagana Keliso 'waineye, Kelisonina i na vevanuga yami nuanua 'waidie.

---

**☆ 3:12:** Efe 2:18; Ibu 4:16   **☆ 3:13:** 2 Tim 2:10   **☆ 3:16-18:** Kolos 2:7; Ion 14:23

Wata a vevelu'ui faifaimi, nuanuaku yami nuakalikali i na vetoketoke. Welavi yadi 'eba veteke-toke 'walamidi, wata bani'odi nuanuaku yami nuakalikali i na 'ivefa'alimi bega 'omi wata Yaubada yana tomotoga 'ifwaidi taiadi, 'ami fata 'wa na 'asetai Keliso yana nuakalikali bwaikaotogina, 'etowava-wayoga. Yana nuakalikalina balawayoga, nago-wayoga, laka-wayoga wata obuwayoga.

<sup>19</sup> Mogitana, nuanuaku Keliso yana nuakalikali bwaikaotogina 'wa na vebaemi wata 'wa na 'asetai, siwe 'wa na nuanua-wayoga. De'e bani'odi Keliso yana nuakalikali i na vebwaikaga 'waimie, nika Yaubada kumanina kebu tamu ava'ai 'waineye i da ve'ale'usaga, i na agemi mogitana.

<sup>20</sup> <sup>☆</sup>Yaubada ta na subisubiai. Fai yana toke-tokena i folofolova 'waideye, naninidi faifaidi ta na nuanua wata ta na velu'uiga, 'ana fata i na veleda, siwe wata ma 'adi 'imoso'i. Mogitana yana 'anivelena bwaikaotogidi 'waideye, yada nuanua wata yada velu'ui i vebwaika-'iawedi.

<sup>21</sup> I lubwaineda ta na subisubiai. 'Ana ve'ililibu i veveluagai wata 'ana subia taiadi Keliso yana tomotoga 'waidega wata Iesu Keliso taunina 'wainega, siwe kebu i na 'a'avaga, i na 'eno-vagata tutuya matatabuna 'waidie. Vona mogitana, yaku nuanua bani'odi.

## 4

*'Ida Iesu tomogona 'waineye 'ada 'aila'a  
'aitamogana.*

---

<sup>☆</sup> **3:20:** Kolos 1:29

**1** ☩Yau Faulo a miamia vanuga 'eba yogona 'waineye 'ada Toveimea Keliso faifaina, begaidi a na vonemi. 'Akonadi 'wa 'asetai naninidi 'atumaidi Keliso i 'idewadiga faifaimi, bega nuanuaku yami mia 'waidie yami sauluva 'atumai'avadi. I lubwainemi bani'odi 'wa na vevesauluvediga fai Yaubada i venua'ivinem'i 'omi yana tomotoga.

**2** ☩Tutuya matatabuna ma yami nuaobu yami sauluva i na bika wata 'wa na tokemaiga. 'Ai'edi emiavo tovetumagana i na vesauluva sakoina 'waimie, ma yami tokemaiga 'wa na nuaka-likaliedimo.

**3** ☩'Anu'anunu 'Atumaina 'wainega 'omi tovetumagana 'ami 'aila'a 'aitamogana, bega 'wa na vewavawava ma emiavo 'wa na veveiana nika yami nuanua 'aitamogana, 'wa da vo yami veiana i da 'itavimi.

**4** ☩'Ida matatabuda Keliso Tomogona, 'Anu'anununina 'Atumaina, 'aitamogana matatabuda i ageda. Wata bani'odi basenadi Yaubada i venua'ivinemiga, 'wa nuani mogitana 'ita'ita'i 'wa na veluagai, matatabumi yami nuanua i vesala.

**5** Keliso taunina 'ada Toveimea 'aitamogana, matatabuda yada vetumagana i vesala, wata bafitaisonina 'aitamogana 'wainega matatabuda ta bafitaiso.

**6** Tomotoga fueda, siwe Tamada 'aitamogana Yaubada. Yaubadanina nani matatabuna wata tomotoga i veveimeyedea, matatabuda 'waidega i folofolova wata matatabuda inagedeye i miamia.

*'Ada veuveuta tulina tulina ta veluagadi Keliso 'wainega.*

**7** <sup>✡</sup>Mogitana matatabuda ta luvetubama Keliso 'wainega, siwe Keliso yana nuakalikali 'aitamogana 'aitamogana 'ada veuveuta i veleda ava'ai i nuaniga bani'odi.

**8** <sup>✡</sup>Keliso 'ada veuveuta i veledaga tamu 'ana vona i 'eno'eno Yaubada yana Buki 'waineye. Basenadiotoga i vona-vagata i vo,

Tutuyanina i laka tabwaotogineye, abame,

'Ana gaviavo yogoyogonidi i nawedi,

We'e tomotoga 'adi veuveuta i veledi, 'adi 'aivaita.

**9** Awale i vo, I laka?" Fai nagami abamega i obuma, kebu i da obumaga 'aisena, siwe wata i obu fwayafwaya nageneye towafa yadi 'eba mia 'waineye.

**10** Tomogonina i obumaga taunina Keliso, siwe i laka abame, kebu abama 'aisena 'waineye i da lakaga, siwe wata i vagalaka bega yana 'eba mia nani matatabuna 'waidie, abame wata fwayefwayeye.

**11** <sup>✡</sup>Kelisonina i lakaga abame, taunina tomotoga 'ada veuveuta 'ana to'anivelena. 'Ifwaidi 'adi veuveuta i velediga, i vetomata'aulele taunina faifaina, 'ifwaidi i vetolu'ivona Yaubada yana Vona faifaina, 'ifwaidi i vetolau'age Iesu Valana 'Atumaina faifaina. 'Ifwaidi 'adi veuveuta i velediga i veto'isave'avina Keliso yana 'Aila'a 'waideye, we'e 'ifwaidi Yaubada yana Vona i veve 'waideye.

---

<sup>✡</sup> **4:7:** Lom 12:3,6    <sup>✡</sup> **4:8:** Same 68:18    <sup>✡</sup> **4:11:** 1 Kol 12:28

**12** <sup>☆</sup>'Ada veuveutanidi i veledaga bega 'waidiega ta na ve'ivaivaita nika Keliso Tomogona 'ida Yaubada yana 'aila'a i na vevebwaika wata i na vevetoketoke.

**13** <sup>☆</sup>Ta na vetoketoke i na nagoga yada nuanua 'aitamogana 'wainega yada vetumagana wata yada 'aseta Yaubada Natuna faifaina i na vesala nika ta na kumaga. Keliso i kumaga wata yana nuanua 'atumai'avadi, wata bani'odi 'ida ta na salai.

**14** <sup>☆</sup>'Ai'edi ta na kumaga Keliso bani'odi yada nuanua fa'alidi. Yavayavava yadi sauluva ta na baileni nuadi a'wadi. Kaukau i na nunuga nani safailidi i bewebewedi, we'e yagina waka i tutuvilivilai kebu bani'odi ta na munega. Tomotoga yadi ve-vekavekali 'waidiega nuanuadi i na fetoda. Yadi venidi 'adi nogaya 'eba nua'ewa, siwe 'ai'edi taunida ta na tauyedaga 'waidie, ve mogitana ta na bailedi.

**15** <sup>☆</sup>Kebu nuada i na a'wa, we'e mogitana ma yada nuakalikali Yaubada yana nuanua tonovidi ta na 'i'idewadi bega yada sauluva matatabuna i na vevetoketoke i na nagoga nika yada sauluva i na vesala Keliso yana sauluva bani'odi. Kellisonina taunina 'unu'unu 'ida yana 'Aila'a 'alo Tomogona.

**16** <sup>☆</sup>Yana toketokena 'wainega 'ida du'u tulina tulina ta tubwa 'waineye i 'i'ive'avinida. Wata yana toketokena 'wainega du'u 'aitamogana 'aitamogana ta na veve'ivaivaita bega nuakalikali 'wainega 'ida yana 'Aila'a 'alo Tomogona ta na

---

<sup>☆</sup> **4:12:** 1 Kol 14:12    <sup>☆</sup> **4:13:** Kolos 1:28    <sup>☆</sup> **4:14:** 1 Kol 14:20

<sup>☆</sup> **4:15:** Efe 4:25    <sup>☆</sup> **4:16:** Kolos 2:19

vevebwaika wata ta na vevetoketoke.

*Mia 'ivauna wata 'atumaina Keliso 'wainega.*

**17** <sup>✧</sup>Fai 'omi Keliso Tomogona, bega yau Kelisonina 'ada Toveimea 'ana wagavayega a na vonemi. Kebu i da lubwainemi Yaubada 'ana tobavu yadi sauluva 'wa na saladi. Nani-'avo'avovo 'aisedi faifaidi i nuanua, nuadi dududubalidi.

**18** Kebu nuanuadi Yaubada i na 'asetai, nuafoudi fa'alidi begaidi i bavuyeni wata Yaubada yana 'anivelena-maimaiga mia 'atumaina wata miamia-vagaina kebu i da veluagai.

**19** Taunidi i tauyedi bunu 'ana nuanua sakoidi 'waidie, i lulu'avo'avovo sakona tulina tulina 'waidie, kebu nuanuadi i na 'ailove, yadi sakanidi faifaidi kebu i da bunumayaga.

**20** We'e 'omi, Keliso 'ana 'aseta 'wa veluagaiga, kebu de'e sauluvanidi sakoidi 'waidiega.

**21** A nuani Iesu Keliso Valana mogitana 'wa nogai, 'wa luku yana 'Aila'a 'waineye, 'aseta 'akonadi 'wa veluagai Iesu yana nuanua tonovidi faifaidi.

**22** <sup>✧</sup>Yami nuanua sakoidi nagami, 'wa na si'a'idi, nuanuananidi i vevekaliemi wata i 'i'ivesakoimi.

**23** Tutuya fuedi taunimi 'wa na tauyemi Yaubada 'waineye bega yami nuanua wata 'anu'anunumi i na 'ive'ivaudi.

**24** Yami nuanuananidi 'ivaudi 'wa na ve'wesenedi, nuanuananidi Yaubada 'ana 'idewadewa taunina yana nuanua bani'odi, nika yami sauluva mogitana 'atumaidi wata magemagetadi.

---

<sup>✧</sup> **4:17:** Lom 1:21    <sup>✧</sup> **4:22:** Kolos 3:9-10; Lom 12:2

**25** ✝Fai yami nuanua 'ivaudi Yaubada yana nuanua bani'odi, vekali 'wa na 'ailove. Matatabuda 'aila'a 'aitamogana Keliso Tomogona begaidi ma edavo ta na vonavona vona mogitana 'waidiega.

**26** 'Wa na nuasakoga sauluva sakoina faifaina, nuami i na veagiagi-matayo'o. I lubwainemi 'aiatanina 'waineye yami nuasako i na 'a'ava, we'e i na vemanawega 'akonadi 'wa sakona.

**27** Kebu Seitani 'wa na wanalen tamu yami sauluva 'wainega i na nunago i na vetoketoke 'waimie.

**28** ✝Egavo i vavainagogga, vainago i na 'ailove, i lubwainedi i na folovamo yadi 'atumaina faifaina bega 'adi fata wata wekowekoma i na 'i'ivaised.

**29** ✝Vona sakoidi kebu 'awamiega i na souyedi, nuanaku bonami 'adi nogaya 'eba 'aivaita. Ava'ai 'wa nuani emiavo i lubwainedi 'adi kiavefa'ala wata yadi 'eba ve'atumai, 'waidiega 'wa na vonavona.

**30** ✝Kebu yami sauluva 'waidiega 'Anu'anunu 'Atumaina 'wa na 'ivenuavitai, 'Anu'anununina Yaubada yana tugusa, i tauyen i agemi bega 'omi yana tomotoga, yada 'eba 'isa 'awaie Yaubada i na tuveobuda.

**31** ✝Vitanidi 'wa veluagadi tomotoga 'ifwaidi 'waidiega kebu faifaidi 'wa na nuanua, kebu 'wa na nuasako-matayo'o, wata yami nuasako kebu 'wa na lumanamanawediga. Kebu 'wa na veta'ata'ala, kebu 'wa na manini-'avo'avovo, wata kebu tamu aitoi 'wa na tolive'edeni vita i na velu-agai faifaina.

---

✖ **4:25:** Efe 4:15    ✖ **4:28:** Fol 20:35    ✖ **4:29:** Efe 5:4; Kolos 4:6

✖ **4:30:** Efe 1:13-14    ✖ **4:31:** Kolos 3:8

**32** <sup>☆</sup>We'e mogitana, ma emiavo 'wa na ve'isanuakalikali, ma yami nuakalikali 'wa na velvesauluva 'atumaina 'waidie. Fai 'wa miave'itubama Keliso taiadi, Yaubada yami sakona i nuatavunidi, wata 'omi bani'odi emiavo yadi sakona 'wa na nunuatavunidi.

## 5

### *Ta na miamia Keliso yana mageta 'waineye.*

**1** Fai 'omi Yaubada natunavo nuafouna wata yami sakona i nuatavunidi, nuanuaku Tamami 'wa na salai.

**2** <sup>☆</sup>Keliso i nuakalikalieda taunina i tauyeni i wafa faifaida, 'omi wata bani'odi yami mia matatabuna 'waidie nuanuaku yami sauluva matatabuna nuakalikali. Keliso taunina i 'aniveleneni Yaubada 'waineye i wafa 'ada 'ita'ita'i faifaina, Yaubada yana 'eba sosoana, 'wa da vo tamu 'aisaya i da velomuyeni magaina 'iwanina sakona 'ana nuatavuna faifaina.

**3** 'Omi Yaubada yana tomotoga magemagetami, i lubwainemi yami sauluva 'atumai'avadi, bega kebu tamu aitoi 'ana fata i na awavesakoyemi. Ve'avula-'avo'avovo wata bunu 'ana nuanua sakoidi 'wa na bailaotogedi, we'e kukua kebu nuami i na 'ewadiga.

**4** <sup>☆</sup>Wata kebu i da lubwainemi naninidi 'adi nogaya sakoidi faifaidi 'wa na sidibidibi, nuadi 'anigaugaudi yadi vona 'wa na bailedi, wata vonanidi ta talabodediga kebu 'waidiega 'wa na manini. We'e mogitana i lubwainemi vona

'atumai'avadi 'waidiega 'wa na vonavona wata 'wa na vevekaiwa Yaubada 'waineye.

**5** <sup>◊</sup>Ava'ai a na vonemiga, vona mogitana. Egavo i veve'avula-'avo'avovo, egavo bunu 'ana nuanua sakoidi i 'i'idewadi, wata egavo kukua nuadi i 'ewa'ewadi kebu tamu sai'af'o 'adi veuveuta i na veluagadi Keliso wata Yaubada yadi 'Eba Veimea nageneye. Tomotoganidi kukua 'adi nua'ewa 'waidie, kebu 'adi veuveuta i na veluagadiga fai kukua 'adi nuakalikali 'waidie bwaikina, 'wa da vo i da 'odu'odu kukuanidi 'waidie, we'e Yaubada kebu.

**6** <sup>◊</sup>Taunimi 'wa na 'i'isave'avinimi bega kebu tamu aitoi i na vekaliemi bonana 'adi nogaya 'eba nua'ewa 'waidiega, sauluvanidi sakoidi siwe i na aware'atumaiedi. Egavo sauluvanidi i na 'i'idewadiga, taunidi Yaubada yana nuanua 'ana tovedumwe'ai'ai, Yaubada ma yana nuasako i na vematavulogidi.

**7** Kebu tamu sai'af'o 'wa na luve'auyedi.

**8** <sup>◊</sup>We'e 'omi, basenadi dudubala 'waineye 'wa miamia 'wa sakosakona, tutuya de'e 'omi Toveimea Keliso yana tomotoga, yana mageta 'waineye 'wa miamia. Fai 'omi mageta 'ana tomotoga, i lubwainemi yami sauluva magemagetadi.

**9** Mageta vuagina sauluva tulina tulina 'atumaidi wata tonovidi, wata sauluvanidi Yaubada yana nuanua mogitana i saladi.

**10** <sup>◊</sup>Mogitana i lubwainemi yami sauluva magemagetadi, wata 'wa na vevetafewa naninidi

---

<sup>◊</sup> **5:5:** 1 Kol 6:9-10    <sup>◊</sup> **5:6:** Lom 1:18    <sup>◊</sup> **5:8:** Kolos 1:13; 1 Fit 2:9

<sup>◊</sup> **5:10:** Lom 12:2

'Auvea yana 'eba sosoana 'wa na 'asetadi.

<sup>11</sup> Sauluva dududubalidi 'wa na bailedi, kebu 'wa na 'abitonovidi, kebu tamu sai'af'o 'aivaita 'wa na veluagai 'waidiega. Sauluvanidi 'wa na sivemagesedi yami sauluva magemagetadi 'waidiega nika tomotoga i na 'isedi i na 'asetadi nani sakoidi.

<sup>12</sup> Sauluvanidi dududubalidi givagivayega i 'i'idewadi nani sakiotogina, 'ai'edi aitoi i na veveifufuyediga 'eba bunumayaga.

<sup>13</sup> <sup>❖</sup>Nani matatabuna ta na sivemagesedi Keliso yana mageta 'wainega, 'adi 'aseta mogitana i na souyedi, 'atumaidi 'alo sakoidi.

<sup>14</sup> 'Ana fata nani matatabuna i na vemageta Keliso yana mageta 'wainega. Begaidi tamu vonawatabai i 'eno'eno tomotoganidi yadi nuanua dududubalidi faifaidi i vo,

'Omi 'wa 'eno'eno, 'wa 'isa,

Wafayega 'wa na tovoi,

Nika Keliso yana magetayega i na magesemi."

### *Ta na tauyeda 'Anu'anunu 'Atumaina i na ageda.*

<sup>15</sup> Fai 'omi mageta 'ana tomotoga yami mia matatabuna 'waidie yami sauluva 'wa na 'i'isave'avinidi, tobavu kebu 'wa na saladi, ma yami 'aseta 'wa na vevenua'ivina 'atumaina.

<sup>16</sup> <sup>❖</sup>Fai tutuya de'e sakona i vevetoketoke kebu 'wa na mia-maimaiga, 'ai'edi tamu aitoi nuanuana 'aivaita, 'wa na 'ivaisenimo.

---

<sup>❖</sup> **5:13:** Efe 2:1    <sup>❖</sup> **5:16:** Kolos 4:5

**17** ☩Wata tomotoga nuadi 'anigaugaudi yadi sauluva kebu 'wa na 'ewadiga, 'wa na veve-wawawawa naninidi 'ada Toveimea Iesu nuanu-anu 'wa na 'idewadiga, 'wa na 'asetadi.

**18** ☩Kebu ufa toketokena 'wa na toke 'wa na yemu, bola nuami i na lugaugaudi, wata i na nunago yami mia i na 'ivesakoi. We'e mogitana taunimi 'wa na tauyemi 'Anu'anunu 'Atumaina 'waineye bega i na agemi mogitana.

**19** ☩Yami veifufu 'waidie, Same Yaubada yana Buki 'wainega, lei 'eba subia, wata lei 'Anu'anunu 'Atumaina yana 'alavelevelena, 'wa na 'ina'inanadi. I lubwainemi 'wa na sososoana, ma yami subia 'wa na leilei 'ada Toveimea Iesu Keliso 'waineye.

**20** ☩Tutuya matatabuna nani 'aitamogana 'aitamogana faifaidi 'wa na vevekaiwa Yaubada Tamada 'waineye, 'ada Toveimea Iesu Keliso 'ana wagavayega.

### *Veimea naginagi faifaidi.*

**21** Fai 'omi Keliso 'wa veve'ililibuyeni, taunimi 'wa na tauyemi emiavo yadi nuanua 'wa na 'i'idewadi.

**22** ☩Wata bani'odi 'omi vevine 'akonadi taunimi 'wa tauyemi 'ada Toveimea Iesu 'waineye, wata bani'odi 'wa na tauyemi yami lalamogavo yadi nuanua 'wa na 'i'idewadi.

**23** ☩'Ida Keliso yana 'Aila'a, taunina i veveimeyedea wata i 'i'isave'avinida. Wata bani'odi tomogo ma yana veimea yana vavine

---

✩ 5:17: Kolos 1:9    ✩ 5:18: Lom 13:13; 8:6    ✩ 5:19: Kolos 3:16

✩ 5:20: Kolos 3:17; 1 Tes 5:18    ✩ 5:22: 1 Fit 3:1    ✩ 5:23: 1 Kol 11:3

i na 'i'isave'avinidi, we'e Keliso 'ida 'aila'anida 'alo Tomogona 'ada To'ita'ita'i.

**24** 'Ida Keliso yana 'Aila'a taunida ta tauyeda yana nuanua ta 'i'idewadi, wata bani'odi 'omi vevine i lubwainemi taunimi 'wa na tauyemi yami lalamogavo yadi nuanua 'wa na veematayakeyakedi nani matatabuna 'waidie.

**25** <sup>☆</sup>We'e 'omi iavetami naginagimi a na vonemi. Keliso 'ida yana 'Aila'a i nuakalikalieda bwaikina, taunina i tauyeni wafa 'waineye faifaida. 'Omi iavetami wata bani'odi i lubwainemi 'aitamogana 'aitamogana yana vavine i na nuakalikaliedi.

**26** <sup>☆</sup>Keliso i wafaga yana 'Aila'a faifaida, bega 'ida magemagetada, yana Vona 'wainega wata 'ilekoa ufayega ta ve'atumai mataneye.

**27** <sup>☆</sup>Wata i wafaga bega 'ida i vagavaida yana 'Aila'a mogitana bani'odi yana vavine, 'ada 'isa 'atumaiotogina, kebu maigida lululunaga, kebu ta da bweluluga 'alo kebu tamu ava'ai 'ada 'isa i da 'ivesakoi, we'e mogitana 'ida magemagetada wata 'atumai'avada mataneye.

**28** 'Omi iavetami Keliso yana sauluvanina 'wa na vetutuyameni tomogo 'aitamogana 'aitamogana yana vavine i na nuakalikaliedi. Tomogomi 'adi nuanua 'waimie bwaikina 'wa 'i'isave'avinidi, wata bani'odi i lubwainemi 'aitamogana 'aitamogana yana vavine 'adi nuanua 'waineye i na vebwaika wata i na 'i'isave'avinidi. 'Ai'edi de'e bani'odi yana vavine i na nuakalikaliedi, siwe 'asa'aiana 'akonadi taunina tomogona i nuakalikalieni fai

---

<sup>☆</sup> **5:25:** Kolos 3:19    <sup>☆</sup> **5:26:** Ibu 10:10; Ion 15:3    <sup>☆</sup> **5:27:** 2 Kol 11:2

tomogonina wata yana vavine 'wa da vo tomotoga 'aitamogana.

**29** <sup>◊</sup>Kebu tamu aitoi taunina tomogona i na 'anigodadageni we'e mogitana i 'i'isave'avini 'atumaina wata i veve'ania, wata bani'odi Keliso yana 'Aila'a ma yana nuakalikali i 'i'isave'avinida.

**30** 'Ida Tomogona, begaidi i 'i'isave'avinida.

**31** <sup>◊</sup>Tamu vona i 'eno'eno Yaubada yana Buki 'waineye tomogo wata yana vavine bani'odi tomotoga 'aitamogana bega i vo,

Faifainanina 'ai'edi tomogo i na nagiga, 'akonadi i 'awa'idia tamana wata inana 'waidiega, yana vavine taiadi i luvetubama.

'Adi 'ailuga siwe 'wa da vo tomotoga 'aitamogana."

**32** Vonanina nageneye, tamu nuanua bwaikina givagivana i 'eno'eno, yaku 'aseta tomogo wata yana vavine yadi luvetubama 'eba 'isa Keliso wata 'ida yana 'Aila'a yada luvetubama faifaina.

**33** Wata 'omi bani'odi, tomogo 'aitamogana 'aitamogana yana vavine i na nuakalikaliedi taunina 'ana nuakalikali bani'odi, we'e vevine 'aitamogana 'aitamogana yadi lalamogavo i na veve'ililibuyedi.

## 6

*Yavayavava wata tamadiavo inadiavo taiadi,  
'adi vona.*

**1** <sup>◊</sup>Yavayavava a na vonemi. Fai 'ada Toveimea Iesu nuanuana, i lubwainemi tamamiavo wata inamiavo 'waidie 'wa na vevematayakayaka.

**2-3** ◊Yaubada yana veimea i 'eno'eno i vo, Tamamiavo wata inamiavo 'wa na ve'ililibuyedi." Veimeanina veimea nagami ma 'ana vona'awaufaufa i vo,

Tamamiavo wata inamiavo 'wa na ve'ililibuyedi bega yami mia matatabuna 'atumaina wata yami mia fwayefwayeye i na vemanawe."

**4** ◊<sup>1</sup>Omi tamadiavo wata inadiavo a na vonemi. Natumiavo kebu 'wa na yagai-maimaigidi i na nunago i na nuasako, we'e mogitana 'wa na ifufudi wata 'wa na awave'ede'ededi 'ada Toveimea Iesu yana nuanua bani'odi.

*Tofolova-maimaiga wata 'adi toveimeavo 'adi vona.*

**5** ◊<sup>1</sup>Omi tofolova, 'ami toveimeavo yadi vona 'wa na vevematayakeyakedi. Ma yami kololo 'wa na veve'ililibuyedi wata yami nuanua 'wa na tauyedi 'wa na vo, 'Aku toveimea yana nuanua a na 'idewadiga, siwe 'asa'aiana 'akonadi a folofolova Keliso faifaina begaidi a na dumwebika."

**6** Kebu 'wa na vo, 'Aku toveimea mataneye a da folova-'atumai 'aku awave'atumai faifaina," we'e mogitana 'ai'edi kebu mataneye, siwe fai 'wa vetofolova-maimaiga Keliso 'waineye ma yami dumwebika Yaubada yana nuanua 'wa na 'i'idewadi.

**7** Ma yami sosoana 'wa na folofolova, 'wa da vo 'wa da folofolova 'ada Toveimea Iesu 'waineye, kebu tomotoga 'aisedi 'waidie.

---

◊ **6:2-3:** Sou 20:12   ◊ **6:4:** Kolos 3:21; Voa 22:6   ◊ **6:5:** Kolos 3:22-23; Tai 2:9

**8** ☩'Wa na nuani, 'ada Toveimea Iesu tomotoga 'aitamogana 'aitamogana i na tutulidi, folova 'atumaidi i 'idewadiga faifaidi, 'ai'edi tofolovamaimaiga 'alo kebu tofolova-maimaiga, siwe i na tutulidi.

**9** ☩We'e 'omi toveimea, wata bani'odi 'wa na vevesauluva 'atumaina yami tofolovavo 'waidie. Kebu 'wa na ve'isakololo 'waidie fai 'omi wata taunidi ma fuemie 'ami Toveimea bwaikina 'aitamogana abame, kebu i da lu'idia, veimea 'aitamogana 'wainega matatabumi i na veimeyemi.

*Seitani ma yana 'aila'avo taunidi 'ada gaviavo.*

**10** Ekwavo, de'e tamu yaku vona 'eba ve'a'ava. 'Omi 'wa miave'itubama 'ada Toveimea Iesu taiadi, begaidi yana toketokena bwaikina 'wainega 'wa na vevetoketoke.

**11** ☩Yaubada yana kukua 'eba vetalaga wata vaigavu i velemiga, matatabuna 'wa na 'ewadi, kukuanidi 'waidiega 'wa na tovoi fa'alina Seitani yana yogosidu 'adi 'eda'eda 'waidie bega kebu i na vekaliemi.

**12** 'Eba vetalaganidi i lubwainemi 'wa na 'ewadi siwe kebu tomotogaotoga taiadi 'wa na vetalaga. We'e mogitana ta vevetalaga Seitani ma yana 'aila'avo taiadi, 'aila'anidi yaiaina sakoidi kebu 'ada fata ta na 'isediga. Mogitana ta vevetalaga yadi to'edakumeta bwaikidi, yadi toveimeavo, wata tomia dudubala ma yadi toketokena taiadi.

**13** ☩Fai Seitani ma yana 'aila'avo taiadi ta vevetalaga, Yaubada yana 'eba vetalaga 'wa na 'ewadi

---

✩ **6:8:** Kolos 3:24-25    ✩ **6:9:** Kolos 4:1    ✩ **6:11:** Iem 4:7; 1 Fit 5:8-9    ✩ **6:13:** 2 Kol 10:4

'waimie i na 'eno'eno bega tutuyanina sakona nuanuana i na vetoketoke 'waimie nika 'omi 'akonadi 'wa tovotovoi fa'alina. 'Wa na vetalaga i na nagoga nika 'omi ma yami toketokena 'wa na tovotovoi.

**14** ◊Bei 'akonadi 'wa tovotovoiga 'wa na tovivagata 'wa na lulukamata. Yaubada yana kukua 'eba vetalaganidi side. Nuanua tonovidi 'wa na vewa'iledi, 'wa na toke 'wa na si'i'idi. Sauluva 'atumaidi nuafoumi 'adi velubabala 'wa na silakavedi.

**15** ◊Iesu Valana 'Atumaina mia 'atumaina faifaina, 'waineye taunimi 'wa na tauyemi 'ami 'eba 'aivaita, 'wa da vo 'ami 'ageyafayafa 'wa da veagedi, 'agemi 'adi velubabala.

**16** Naninidi 'wa na 'idewadi i na 'a'avana wata 'wa na toke 'wa na 'abi fa'alina yami vetumagana 'waidie bani'odi yami babala. Yami babalanina 'wainega 'ami fata Seitani kumanina tosakona yana 'ibadi 'ala'alaidi 'wa na luve'weudi.

**17** ◊'Ita'ita'i Keliso i velemiga 'wa na 'ewai, bani'odi 'unu'unumi 'adi velubabala. Wata 'Anu'anunu 'Atumaina yana kefata nigonigona, taunina Yaubada yana Vona 'wa na 'ewai.

**18** ◊Naninidi 'wa 'ewadi 'wa na 'idewadiga, siwe wata 'wa na vevelu'ui Yaubada 'waineye i na 'i'ivaisemi. Tutuya matatabuna velu'ui tulina tulina 'waidiega 'wa na vevelu'ui Yaubada 'waineye 'Anu'anunu 'Atumaina yana awave'eda'eda 'wainega. Yami velu'uinidi 'waidie kebu nuanuaku 'wa na 'abiawa, 'wa na 'isa'isa wata tutuya matatabuna 'wa na vevelu'ui

Yaubada yana tomotoga faifaidi.

**19** ☩Wata nuanaku 'wa na vevelu'ui faifaiku bega tutuyanina a na vo, A na veifufu," Yaubada yana 'alavelavelagi 'wainega a na veveifufu nika ma yaku venuafoufa'ala Iesu Valana 'Atumaina 'ana nuanua givagivadi a na sivemagesedi.

**20** Yaubada i venua'ivineku a vetomata'aulele Valananina faifaina, siwe Yaubada 'ana tovedumwe'ai'ai i yogoniku i yatoku de'e vanuga 'eba yogona 'waineye a miamia. Begaidi 'wa na vevelu'ui nika kebu a na kololo i lubwainekeu a na veveifufumo.

### *Faulo yana 'alanuai.*

**21-22** ☩Ekwavo, nuanaku valaku 'wa na 'asetai begaidi iaku mogitana Tikiasa a na vetunei 'waimie. Tomogonina todumwebika 'ada Toveimea Iesu yana folova 'waineye, nani matatabuna i na lu'ivona 'waimie nika 'wa na 'asetama 'ama vebae wata ava'ai 'a vivai. Wata a na vetuneiga bega i na kiavefa'alimi wata nuami i na 'iveagiagidi.

**23** Ekwavo, 'omi Iesu 'ana tovetumaganavo a vevelu'ui faifaimi, nuanaku Yaubada Tamada wata 'ada Toveimea Iesu Keliso nuanua bikana i na velevalemi mia 'atumaina taiadi, wata nuanaku nuakalikali i na velevalemi, vetumagana toketokena taiadi.

**24** ☩!Omi wata 'ifwaidi tomotoga yami nuakalikali 'wa yato-vagaseni 'ada Toveimea Iesu Keliso 'waineye, nuanaku Yaubada ma yana nuakalikali matatabumi 'waimie i na vevesauluva 'atumaina.

EFESO 6:24

xxx

EFESO 6:24

'Asa'aiana bani'odi,  
Yau Faulo.

**YAUBADA YANA VONA'AWAUFAUFA 'IVAUANA  
The New Testament in the Iamalele Language of Papua  
New Guinea**

**Nupela Testamen long tokples Iamalele long Niugini**

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files  
dated 31 Aug 2023

db771331-f438-5051-a7d5-80ea6197c078